

17-bob. Davlat byudjeti to'g'risidagi Qonunni qabul qilish tartibi  
(17-bobning nomi O'zbekiston Respublikasining 2019 yil 9  
dekabrdagi O'RQ-590-sonli Qonuni tahririda — Qonun  
hujjatlari ma'lumotlari milliy bazasi, 10.12.2019 y.,  
03/19/590/4129-son)

97-modda. Davlat byudjeti to'g'risidagi qonun loyihasini va  
byudjetnomani kiritish tartibi

Davlat byudjeti to'g'risidagi qonun loyihasi va  
byudjetnoma:

O'zbekiston Respublikasi Moliya vazirligi tomonidan  
O'zbekiston Respublikasi Vazirlar Mahkamasiga — joriy yilning  
15 sentyabriga qadar kiritiladi;

O'zbekiston Respublikasi Vazirlar Mahkamasi tomonidan  
O'zbekiston Respublikasi Prezidenti Administrasiyasiga — joriy  
yilning 20 sentyabriga qadar kiritiladi;

O'zbekiston Respublikasi Vazirlar Mahkamasi tomonidan  
O'zbekiston Respublikasi Hisob palatasiga xulosa taqdim etishi  
uchun — joriy yilning 20 sentyabriga qadar kiritiladi.  
O'zbekiston Respublikasi Hisob palatasi O'zbekiston  
Respublikasi Vazirlar Mahkamasiga Davlat byudjeti  
to'g'risidagi qonun loyihasi va o'rta muddatli davr uchun fiskal  
strategiya bo'yicha xulosani joriy yilning 5 oktyabridan  
kechiktirmay taqdim etadi;

O'zbekiston Respublikasi Vazirlar Mahkamasi tomonidan  
O'zbekiston Respublikasi Oliy Majlisining Qonunchilik  
palatasiga, qoida tariqasida, joriy yilning 15 oktyabridan  
kechiktirmay O'zbekiston Respublikasi Hisob palatasining  
xulosasi bilan kiritiladi.

Byudjetnoma O'zbekiston Respublikasi Vazirlar  
Mahkamasi tomonidan O'zbekiston Respublikasi Oliy  
Majlisining Senatiga ham, qoida tariqasida, joriy yilning 15  
oktyabridan kechiktirmay kiritiladi.

Davlat byudjeti to'g'risidagi qonun loyihasi, o'rta muddatli  
davr uchun fiskal strategiya, Davlat byudjetining va davlat

maqsadli jamg'armalari byudjetlarining ijrosi to'g'risidagi hisobotlar O'zbekiston Respublikasi Oliy Majlisining Qonunchilik palatasiga yuborilishidan oldin majburiy ravishda jamoatchilik muhokamasiga qo'yiladi, shuningdek O'zbekiston Respublikasi Moliya vazirligi tomonidan ishlab chiqiladigan «Fuqarolar uchun byudjet» axborot nashri jamoatchilik muhokamasi uchun parallel ravishda e'lon qilinadi.

*(97-modda O'zbekiston Respublikasining 2019 yil 9 dekabrda O'RQ-590-sonli Qonuni tahririda — Qonun hujjatlari ma'lumotlari milliy bazasi, 10.12.2019 y., 03/19/590/4129-son)*

#### 98-modda. Davlat byudjeti to'g'risidagi Qonunni qabul qilish

Davlat byudjeti to'g'risidagi qonun loyihasi O'zbekiston Respublikasi Oliy Majlisining Qonunchilik palatasi tomonidan, qoida tariqasida, joriy yilning 15 noyabriga qadar ko'rib chiqilishi kerak.

O'zbekiston Respublikasi Oliy Majlisining Qonunchilik palatasi tomonidan qabul qilingan Davlat byudjeti to'g'risidagi Qonun O'zbekiston Respublikasi Oliy Majlisining Senatiga ko'rib chiqish uchun qabul qilingan kundan e'tiboran besh kun ichida yuboriladi.

Davlat byudjeti to'g'risidagi Qonun O'zbekiston Respublikasi Oliy Majlisining Senati tomonidan, qoida tariqasida, joriy yilning 15 dekabridan kechiktirmay ma'qullanadi.

*(98-modda O'zbekiston Respublikasining 2019 yil 9 dekabrda O'RQ-590-sonli Qonuni tahririda — Qonun hujjatlari ma'lumotlari milliy bazasi, 10.12.2019 y., 03/19/590/4129-son)*

#### 99-modda. Qoraqalpog'iston Respublikasi byudjetini, viloyatlar va Toshkent shahar mahalliy byudjetlarini tasdiqlash

Qoraqalpog'iston Respublikasi byudjeti, viloyatlar va Toshkent shahar mahalliy byudjetlarining navbatdagi yil uchun

loyihalari Qoraqalpog‘iston Respublikasi Vazirlar Kengashi, viloyatlar va Toshkent shahar hokimliklari tomonidan Davlat byudjeti to‘g‘risidagi Qonun kuchga kirkandan keyin bir hafta muddatda, Davlat byudjeti to‘g‘risidagi Qonunga muvofiqlashtirilgan holda tegishli ravishda Qoraqalpog‘iston Respublikasi Jo‘qorg‘i Kengesi, xalq deputatlari viloyatlar va Toshkent shahar Kengashlariga kiritiladi.

Qoraqalpog‘iston Respublikasi Jo‘qorg‘i Kengesi, xalq deputatlari viloyatlar va Toshkent shahar Kengashlari tomonidan tegishli ravishda Qoraqalpog‘iston Respublikasi byudjeti, viloyatlar va Toshkent shahar mahalliy byudjetlari to‘g‘risida uch kun muddatda qaror qabul qilinadi.

Navbatdagi yil uchun tuman va shaharlar byudjetlarining loyihalari tuman va shaharlar hokimliklari tomonidan Qoraqalpog‘iston Respublikasi byudjeti, viloyatlar va Toshkent shahar mahalliy byudjetlari to‘g‘risidagi qarorlar qabul qilingandan keyin uch kun ichida tegishli ravishda xalq deputatlari tuman va shaharlar Kengashlariga kiritiladi.

Xalq deputatlari tuman va shaharlar Kengashlari tomonidan tumanlar va shaharlarning byudjetlari to‘g‘risidagi qarorlar uch kun ichida qabul qilinadi.

*(99-modda O‘zbekiston Respublikasining 2019 yil 9 dekabrda O‘RQ-590-sonli Qonuni tahririda — Qonun hujjatlari ma’lumotlari milliy bazasi, 10.12.2019 y., 03/19/590/4129-son)*

*Qarang: O‘zbekiston Respublikasi Konstitusiyasining 122-moddasining ikkinchi qismi, Mazkur kodeksning 27, 28, 35, 52, 93, 94 -moddalari, O‘zbekiston Respublikasi Prezidentining 07.06.2017 yildagi “Mahalliy davlat hokimiyati organlarining byudjet vakolatlarini kengaytirish va mahalliy byudjet daromadlarini shakllantirishdagi mas’uliyatini oshirish to‘g‘risida” gi PQ-3042-sonli qarori.*

## 100-modda. Davlat byudjetini va davlat maqsadli jamg'armalari byudjetlarini yetkazish

Davlat byudjetining, davlat maqsadli jamg'armalari byudjetlarining asosiy parametrlari tasdiqlanganidan keyin O'zbekiston Respublikasi Moliya vazirligi:

Qoraqalpog'iston Respublikasi byudjeti, viloyatlar va Toshkent shahar mahalliy byudjetlari daromadlari va xarajatlari hajmlarini, shuningdek ularga O'zbekiston Respublikasi respublika byudjetidan beriladigan subvensiyalar, o'tkazib beriladigan daromadlar dotasiyalar va maqsadli ijtimoiy transfertlar hajmlarini Qoraqalpog'iston Respublikasi Vazirlar Kengashi, viloyatlar va Toshkent shahar hokimliklari e'tiboriga — uch ish kuni ichida;

*(100-modda birinchi qismining ikkinchi xatboshisi O'zbekiston Respublikasining 2017 yil 29 dekabrda O'RQ-454-sonli Qonuni tahririda — Qonun hujjatlari ma'lumotlari milliy bazasi, 01.01.2018 y., 03/18/454/0493-son)*

byudjet mablag'larini taqsimlovchilar va davlat maqsadli jamg'armalarini taqsimlovchi organlar uchun belgilangan daromadlar va xarajatlarning hajmlarini ularning e'tiboriga — o'n ish kuni ichida yetkazadi.

Qoraqalpog'iston Respublikasi byudjeti, viloyatlar va Toshkent shahar mahalliy byudjetlari tasdiqlangandan keyin Qoraqalpog'iston Respublikasi Moliya vazirligi, viloyatlar va Toshkent shahar hokimliklarining moliya boshqarmalari:

tumanlar va shaharlar byudjetlarining daromadlari va xarajatlari hajmlarini, shuningdek ularga tegishincha Qoraqalpog'iston Respublikasining respublika byudjetidan, viloyatlarning viloyat byudjetlaridan va Toshkent shahrining shahar byudjetidan beriladigan subvensiyalar, o'tkazib beriladigan daromadlar dotasiyalar va maqsadli ijtimoiy



transfertlar hajmlarini tumanlar va shaharlar hokimliklari e'tiboriga — uch ish kuni ichida;

*(100-modda ikkinchi qismining ikkinchi xatboshisi O'zbekiston Respublikasining 2017 yil 29 dekabrda O'RQ-454-sonli Qonuni tahririda — Qonun hujjatlari ma'lumotlari milliy bazasi, 01.01.2018 y., 03/18/454/0493-son)*

Qoraqalpog'iston Respublikasining respublika byudjetidan, viloyatlarning viloyat byudjetlaridan va Toshkent shahrining shahar byudjetidan moliyalashtiriladigan byudjet tashkilotlari hamda byudjet mablag'lari oluvchilar e'tiboriga ular uchun nazarda tutilgan byudjetdan ajratiladigan mablag'lar hajmlarini — bir haftalik muddatda yetkazadi.

*(100-moddaning ikkinchi qismi O'zbekiston Respublikasining 2015 yil 29 dekabrda O'RQ-396-sonli Qonuni tahririda — O'R QHT, 2015 y., 52-son, 645-modda)*

Tumanlar va shaharlar byudjetlari tasdiqlanganidan keyin tumanlar va shaharlar hokimliklarining moliya bo'limlari tumanlar va shaharlar byudjetlaridan moliyalashtiriladigan byudjet tashkilotlari hamda byudjet mablag'lari oluvchilar e'tiboriga ular uchun nazarda tutilgan byudjetdan ajratiladigan mablag'larning hajmlarini bir haftalik muddatda yetkazadi.

*(100-modda O'zbekiston Respublikasining 2015 yil 29 dekabrda O'RQ-396-sonli Qonuniga asosan uchinchi qism bilan to'ldirilgan — O'R QHT, 2015 y., 52-son, 645-modda)*

## 101-modda. O'zbekiston Respublikasining Favqulodda Davlat byudjeti

O'zbekiston Respublikasining Favqulodda Davlat byudjeti O'zbekiston Respublikasining Prezidenti qaroriga ko'ra favqulodda holat sharoitlarida qabul qilinadigan byudjetdir.

Ijro etuvchi hokimiyat organlari favqulodda holat sharoitlarida byudjet sohasidagi vakolatlarini O'zbekiston Respublikasi Prezidentining qaroriga ko'ra amalga oshiradi.

O'zbekiston Respublikasi Favqulodda Davlat byudjetining amal qilishi davrida O'zbekiston Respublikasi Oliy Majlisi palatalarining O'zbekiston Respublikasi Davlat byudjeti to'g'risidagi qarorlarining, shuningdek Qoraqalpog'iston Respublikasi Jo'qorg'i Kengesining, xalq deputatlari viloyatlar va Toshkent shahar Kengashlarining Qoraqalpog'iston Respublikasining byudjeti, viloyatlar va Toshkent shahar mahalliy byudjetlari daromadlari va xarajatlari hajmi haqidagi qarorlarining amal qilishi to'xtatib turiladi.

O'zbekiston Respublikasi Favqulodda Davlat byudjetining amal qilishi tugatilishi bilan Davlat byudjeti va davlat maqsadli jamg'armalari byudjetlari parametrlariga aniqlik kiritiladi.

*Qarang: O'zbekiston Respublikasi Prezidenti huzuridagi Vazirlar Mahkamasining 1991 yil 26 noyabrdagi 1991 yil IV choragi uchun favqulodda byudjet ijrosini ta'minlash bo'yicha qo'shimcha chora-tadbirlar to'g'risida"gi 301-sonli qarori.*